



Farg'ona haqiqati

Ijtimoiy-siyosiy, ma'naviy-ma'rifiy gazeta

<http://farhaqiqat.uz/>t.me/farhaqiqati**Сўнгги хабарлар****КУВАЙТЛИК ТАДБИРКОРЛАР ИСТИҚБОЛЛИ ЛОЙИХАЛАРНИ ТАКЛИФ ҚИЛДИ**

Кувейтнинг "Gulf care general trade" ҳамда "Energy solutions" компаниялари бошқаруви кенгаши раиси Эйад ал-Салеҳ раҳбарлигидаги делегация вилоятимизга ташриф буюрди.

Вилоят ҳокими Хайрулло Бозоров қабулида тиббиёт, фармацевтика, энергетика ҳамда тоғ-кон саноати соҳаларида ҳамкорлик истиқболлари муҳокама қилинди, инвестицион ва савдо-иқтисодий лойиҳаларни амалга ошириш бўйича фикрлар алмашилди.

Ўзаро ҳамкорликка кўра, кувейтлик тадбиркор Фарғона вилоятида давлат тиббиёт муассасаси учун диагностика-лабораториясини ташкил этиш ва жиҳозлаш лойиҳасини беғараз амалга оширади. Шунингдек, ипакни қайта ишлаш, заргарлик, тоғ-кон саноати каби йўналишлардаги лойиҳалар бўйича келишиб олинди.

ХИТОЙДАН ФАРҒОНАГА УНУМДОР ТЕХНИКАЛАР КЕЛАДИ

Хитойнинг қишлоқ хўжалиги техникалари ишлаб чиқарадиган "Shandong Swan cotton industrial machinery Stock Co." LTD компанияси юқори технологияли қишлоқ хўжалиги машиналарини Фарғонага олиб кириш, кейинчалик эса вилоятнинг ўзида ишлаб чиқаришни маҳаллийлаштириш ниятида.

Ҳамкор давлат инвесторларини қабул қилган вилоят ҳокими Хайрулло Бозоров икки давлат ўртасидаги ўзаро дўстона ва манфаатли ҳамкорлик алоқалар йил сайин мустаҳкамланиб бораётганини таъкидлади. Ўз навбатида, компания бош директори Ванг Хин Тинг Фарғона вилояти билан ҳамкорлик қилишдан мамнунлигини айтиб ўтди.

Хитой компанияси раҳбари замонавий пахта териш машиналарини вилоятга олиб келиш билан бирга, ушбу техникаларга шу ернинг ўзида сервис хизматларини ташкил этиш, маҳаллий механизаторларни Хитойда ўқитиш, малакаларини ошириш бўйича ҳамкорлик қилишга тайёр эканлигини маълум қилди.

Самимий учрашув сўнггида муҳокама қилинган масалалар бўйича аниқ таклифлар ишлаб чиқиш ва ўзаро ҳамкорликда иш ташкил этишга келишиб олинди.

(Фарғона вилояти ҳокимлиги Ахборот хизмати хабарлари асосида тайёрланди).

КАМ ТАЪМИНЛАНГАН АҲОЛИ ВАКИЛЛАРИ Қўллаб-қувватланмоқда

Ўзбекистон Республикаси Бош прокуратураси ҳузуридаги Мажбурий ижро бюросининг Фарғона шаҳар бўлими ижро ҳужжатлари асосида давлат божи, жиний ҳамда маъмурий жарималарни мунтазам ундириб келмоқда.

2023 йил давомида ундирув ва давлат фойдасига ўтган товарлар сотилишидан тушган 12 миллиард сўмдан ортиқ маблағ маҳаллий

бюджетга ўтказилиши таъминланди.

Бўлим томонидан ундирилган маблағлар ҳисобидан ўтган йилда

"Темир дафтар", "Аёллар дафтари" ва "Ёшлар дафтари"га киритилган аҳолининг кам таъминланган ва эҳтиёжманд қатламни қўллаб-қувватлаш учун очилган махсус ҳисоб-рақамга 6 миллиард 772 миллион сўм ўтказиб берилди.

ДИСМОЙЛОВ,
МИБ Фарғона шаҳар бўлими бошлиғи.

ДОЛЗАРЪ МАВЗУДА СУХБАТ

СУВ ТЕКИН ЭМАС



Ўзбекистон Республикаси Президентининг 2024 йил 5 январда "Қуйи бўғинда сув ресурсларини бошқариш тизимини такомиллаштириш ҳамда сув ресурсларидан фойдаланиш самарадорлигини ошириш чора-тадбирлари тўғрисида"ги қарори қабул қилинди. Унда сув ресурсларидан самарали фойдаланиш, суғориш маданиятини юксалтириш, сув тежовчи технологияларни жорий этиш кўламини кенгайтириш мақсадида тегишли чора-тадбирлар белгилаб берилди.

Мухбиримиз Сирдарё – Сўх ирригация тизимлари хавза бошқармаси бошлиғи Фахриддин ТУРСУНОВ билан шу ҳақда суҳбатлашди.

– Қарорда белгиланган вазифаларни ҳаётга татбиқ этиш туфайли сув хўжалиги соҳасида ривожланиш даври бошланади. Фермер хўжаликчлари ва бошқа истеъмолчиларга кафолатланган сув етказиб бера оладиган тизим йўлга қўйилади. Туман ирригация бўлимлари ҳамда махсус хизматлари негизда "Сув етказиб бериш хизмати" давлат муассасалари ташкил этилиб, улар ўзига бириктирилган ҳудудда сувнинг ҳисоби ва ҳисоботини юритади. Суғориш тармоқлари ва улардаги гидротехник иншоотларни соҳа ҳолатда сақлаш, таъмирлаш-тиклаш ишларини амалга оширади. Сув истеъмолчиларининг буюртманомаси асосида бошқа сув хўжалиги хизматларини кўрсатади.

Сув хўжалиги ташкилотлари томонидан қишлоқ хўжалиги ишлаб чиқарувчиларига сув етказиб бериш хизматлари учун



тўловлар бекор қилинади. Сув ресурсларидан фойдаланганлик учун солиқдан (2024 йилдан 1 м3 сув солиғи 100 сўм) давлат бюджетига тушган тушумнинг 40 фоизи "Сув етказиб бериш хизмати" фаолиятини молиялаштириш, улар балансидаги объектларни сақлаш ва техник ҳолатини яхшилашга йўналтирилади. Туман (Кувасой шаҳар) ирригация бўлимлари ҳисобидаги

мавжуд бино ва асосий воситалар "Сув етказиб бериш хизмати" давлат корхонаси ҳисобига ўтказилади.

Истеъмол қилинган сув миқдори ҳисобини юритмаган қишлоқ хўжалиги маҳсулотлари ишлаб чиқарувчилар учун солиқ базаси халқ депутатлари туман Кенгаши томонидан тасдиқланган лимитларга нисбатан икки баробар оширилган ҳолда ҳисобланади.

2025 йилдан бошлаб сув тежовчи технологиялар жорий қилингани ҳолда, олинган сув ҳажми ўлчаш ускуналари асосида аниқланганда солиқ ставкаси 0,5, балиқчилик учун олинган сув ҳажми ўлчаш ускуналари асосида аниқланганда 0,7 камайтириб, сув тежаш технологиялари жорий қилинмаган ҳолда, сув ҳажми ўлчаш ускуналари асосида аниқланмаганда солиқ ставкасига 1,5 оширувчи коэффициент қўлланилади.

Бу йилдан бошлаб, суғориладиган ерларда янги боғдорчилик, узумчилик ва бошқа кўп йиллик дарахтзорлар ҳамда энгил типдаги иссиқхоналар ташкил этишда ваколатли органлар томонидан хулосалар фақат сув тежайдиган суғориш технологияларини жорий қилиш шарти билан берилди.

(Давоми 2-бетда).

ЖАМИЯТ ОҒРИҒИ

ТЕАТР ТОМОШАБИДАН НЕГА УЗИЛИБ ҚОЛДИ?

Бугун театр томоша залларини ҳақиқий шинавандалар эмас, мажбуран, иложсизликдан ўриндиққа "михланган" "ихлосмандлар" тўлдирмоқда. Назаримда ҳаётимизга шиддат билан кириб келаётган ахборот технологиялари ушбу санъатни жамиятдан биров чекинишга, томошабинни театрдан узоқлаштиришга мажбур қилгандек.

Ҳа, ҳозирги даврда театр санъати оқсаб қолди. Енгил-елпи ҳазил-мутойибага йўғрилган, маънавий тарбиядан йироқ томошалар, номи ва қўшиқларида ҳеч қандай маъно йўқ ҳавойи гуруҳларнинг концертга тумонат одам йиғилмоқда-ю, ҳақиқий санъат асари намойишига келганда кимдир иши кўп, вақти йўқ, бошқаси эса спектаклда жонли ҳаёт тасвирланган воқелиқдан маънавий хордиқ қиларишдан роҳатланмайди.

Театр шунчаки оддий томошахона



эмас, балки тарбия, маданият, маънавият ва маърифат маскани эканлигини, афсуски, кўпчилик яхши англаб етмайди. Аслини олиб қараганда, театр ҳар қандай даврда ҳам ҳаётини сабоқ берувчи жонли восита ҳисобланган. Бу кўҳна оламнинг санъат-севар одамлари ушбу тарбия масканини жуда қадимдан қашқ қилган. Маърифат-парвар адиб Махмудхўжа Бехбудий ўлкани саводли қилишга, маънавият сарчашмаларидан чанқоқ босишга ундар экан, "Театр ибратхонадир" дейди. Унинг тарбияга йўғрилган драмалари саҳналаштирилиб, ўз даврида кишиларни одамийликка чорлаганди.

(Давоми 2-бетда).

Ибрат

Қўқонда ўқувчилар учун БЕПУЛ АВТОБУС ХИЗМАТИ Йўлга қўйилди

Эрта тонгда йўл бўйларига қўлига пул ушлаганча, жамонат транспортга ёки йўловчи ташиш билан шуғулланаётган автомашиналар ҳайдовчиларига қўл силтаётган ўқувчиларга кўзингиз тушадди. Елкасига сумка илган болаларга ҳамма автобуслар ёки кирақашлар ҳам тўхтавермайди.

Қўқонлик Раҳматилло Қодировнинг ўқувчиларга бўлган шу каби муносабатлардан, эътиборсизликлардан дили ранжийди. У Қўқон шаҳридаги автомобиль йўллари коллежини тамомлаб, ҳайдовчи бўлиб ишлаб юрган кезлардан мактабга шашаётган ўқувчиларни манзилига беминнат элтиб қўйишни канда қилмасди. "Раҳмат, тоға" деган ширин каломни эшитганда, кўнгли кўтариларди.

Йиллар ўтди. Раҳматилло Қодиров яқка тартибдаги тадбиркор сифатида фаолият кўрсата бошлади. У шу йилнинг бошидан хайрли ишга қўл урди. Мутасадди ташкилотлар билан келишган ҳолда, шаҳардаги 9, 13, 16, 17, 21, 40, 41-умумтаълим мактаблари ўқувчилари учун бепул автобус хизмати йўлга қўйди.

– Энди ўқувчилар эрта тонгда йўл бўйида туриб қолмайди. Улар белгиланган вақтларда



бекатларга келиб туришса бўлгани. Болаларни ўз фарзанди, набирасидай суюлган ҳайдовчилар техник соз, тоза автобусда мактабларга қадар етказиб қўяди. Ҳозирда ҳар куни 100-120 нафар ўқувчига хизмат кўрсатилаяпти. Эндиликда йўналишни узайтириш ҳаракатидамыз, яқин орада ҳалқа йўли бўйлаб автобус қатнови йўлга қўйилади. 1, 10, 14, 20, 25, 26, 28-умумтаълим мактаблари ўқувчилари ҳам беминнат хизматимиздан

фойдаланишади. Бундай хайрли ишни қўшни туманларда, Фарғона шаҳрида ҳам давом эттирамиз, – дейди тадбиркор Раҳматилло Қодиров.

– Автобусда мактабга бораётган ўқувчилар жуда мамнун, албатта. Ота-оналарини айтмайсизми, фарзандларининг билим масканига хавфсиз етиб боришаётганидан хурсанд, бунинг устига йўл кира учун сарфланган маблағлари тежалаяпти. Тадбиркорга биз педагогларнинг миннатдорчилиги чекисиз, – дейди Қўқон шаҳар халқ таълими бўлими ахборот хизмати раҳбари Шоирахон Комилжоннова.

Раҳматиллонинг яна бир саховатининг иши эшитгани беҳад қувонтиради. У "Yo'lma-yo'l Qo'qon" телеграм гурухи асосчиларидан бири сифатида қўнғили ҳайдовчиларни хайрли ишларга чорлай олди. Бугун қўқонлик қўли очик, саховатпеша йигитлар эҳтиёжманд, кам таъминланган, боқувчисини йўқотган, бемор, кўйинги, меҳрга муҳтож инсонларга бепул автомобиль хизматини кўрсатишмоқда. Қишқи таътил чоғи пойтахтда ўқийётган кўлаб талабалар ҳам бу инсонлар кўмағида оилалари бағрига қайтишди.

Раҳматилло Қодиров топган даромадининг бир қисмини яхши ишларга сарфлаш йўлини танлабди. Саховатпеша тадбиркорга ҳар қанча ташаккур айтсанг арзийди, албатта. Яхшиликлар сари интилган, эзгу ишларни дастуриламал қилган ишбилармонлар сафи кенгайверсин.

Маҳиёра БОЙБОБОВА.

